



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim tir_yimyim

tir yimyim TAPAK 7

ISSF World Cup: Maskar-i 10m air rifle asaya nung silver angu

North Korea-i South Korea den arrtsü anasa lenmang poksa



VOL. XXII ISSUE NO. 07 (ADOK 07) DIMAPUR RASEMNÜ (WEDNESDAY) MONGPUTENI (OCTOBER) 16, ₹ 5.00

Advisor Küdecho Khamo-i NHIDCL aitsür

Dimapur, October 15, 2024 (TYO): National Highways and Infrastructure Development Corporation Limited (NHIDCL)-i NH-29 (Kohima-Jessami Road) nung aser talisa Kikruma-Chakhabama nung mapa shitak meinyaker ta CAWD and Taxes Advisor Küdecho Khamo-i aitsüogo.

Mongulbarnü Phek District Planning and Development Board (DPDB) senden nung Khamo-i mapa shitak meinyakba onük benoka jemi.

NHIDCL-i mapa kanga meilungi aser mejudi inyaker aser külen maintenance contractors-ia mapa meinyaker.

NHIDCL-i tzungluruwa aser parnoki shimtetba maintenance contractors dak dang tai tongloktsür. Iba ajanga senzusenbongertemi timtem jenti ajurur aser senotsü talila akoksar, ta Advisor Khamo-i ashi.

NHIDCL-i Nagaland nungbo mapa mejudi inyaker saka tanga state tem nungbo mapa kanga junga inyakba angudang parnoki Nagaland nung alirtem mezügmeshir ama bilemer, ta paisa ashi.

NHIDCL-i yamai dang inyaka ora public-i masüba mapa kar inyaksü akok ta Khamo-isa tekümdangtsü olen ka ashi.

Dr J Alam-i AHOds/HODs senden ayonga amen

Dimapur, October 15, 2024 (TYO): Chief Secretary Dr. J Alam, IAS-i October 15, 2024 nü Secretariat Conference Hall, Kohima nung Administrative Head of Departments aser Head of Departments (AHOds/HODs) senden ka menogo.

"District office tem nung Head of Office-i mapai maoba osang aika arua lir anungji Head of Offices ajak pei mapa lemkükdak alitsüla aser nenok sodi agitsüsa kümra HoDs nem osang sangoktsütsüla" ta Alam-isa ashi.

Nübor tenzüksü atema sorkari sorkar mapa inyaker nem itasen agütsür anungji Head of Office ajak pei lemkükba tesem nung mapang ajak nung alitsüla ta paisa shisem.

Alam-isa department ajak dang biometric attendance system nung register asütsü aser directorate o district offices nung attendance kanga junga reprangtsü tetuyuba agütsü.

"Directorate of Youth Resources & Sports nung tang tamshidak attendance APP ya tanga Department temia

amshitsüla kechiyong iba ajanga department-i staff indang attendance kanga junga repranger" ta CS Alam-isa ashi.

"Tesüba dang nungi taküm Hornbill Festival 2024 tuluba amongtsü kechiyong taküm küm 25 ajunger. Anungji Allied Departments-i yaritepa Kisama nung mapa inyakba ajak mapang shitak nung renemtsü imlar" ta paisa ashi.

Hornbill Festival metenzükdang October 21 aser November ita hopta tasembuba nung state wide mass social work anaben alitsü. Anungji PHE, PWD aser Police ama line Departments-i akokba tashi nübo aser garitem agüja yariteptsü mepishir ta Alam-isa metetdaksü.

"Finance Commission-i November 2-4, 2024 tashi Nagaland semdangi arutsü aser Finance Commission recommendations ya Nagaland atema kanga tongtipang lir. Anungji department ajaki akokba tashi nung yariteptsü ayongzüker aser parnok arudang AHODs aser HODs ajak station nung alitsüla" ta paisa shisem.

Meitei, Kuki & Naga MLA tem ajurutep

New Delhi, October 15, 2024 (Agencies): Manipur nung yimjung atema mera tulu ka agiogo aser ibaji Mongulbarnü New Delhi nung Meitei, Kuki aser Naga MLA tem mezüng ajurutepa senden amenba lir.

Meitei aser Kuki nunger tsüngda ken o angatetteptsü aser Manipur nung rara anendaktsütsü atema Ministry of Home Affairs (MHA)-i iba senden ayonga amen.

Senden nung Meitei tsütsü nungi Manipur Assembly Speaker Thokchom Satyabrata Singh aser MLA Tongbram Robindro aser MLA Th. Basantakumar Singh nunger aden.

Letpao Haokip aser Nemcha Kipgen na aden. Tenaprong ya state minister tem lir. Külen, Naga nunger tenüng nung MLA asem-Ram Muivah, Awangbow Newmai aser L Dikho nunger aden.

Senden nung home ministry atema interlocutor A K Mishra aser tanga tongti ketdangsurtem aden. Ajisüaka Union Home Minister Amit Shah aser Manipur Chief Minister N Biren Singh na maden.

Manipur nung tensa süngjemdaksütsü atema Kuki aser Meitei nunger tsüngda olemteptsüla ta Home Minister Amit Shah-i ashiba sülen ita ka shi lir tanü senden menogo.

Jual Oram-i Indisen aser Lake View nung Community Hall lapoktsü



October 15, 2024 nü Union Minister for Tribal Affairs Jual Oram-i Indisen nung Community Hall lapoktsüdang agiba noksa ka angur.

Dimapur, October 15, 2024 (TYO): Union Minister for Tribal Affairs Jual Oram-i Mongulbarnü Indisen nung Community Hall lapoktsüogo.

Iba mapa atema Ministry of Tribal Affairs-i senotsü teyari agütsü aser Tribal Affairs department, Nagaland-i mapa inyak.

Prime Minister-i Vikshit Bharat-developed India yangertsü atema northeast region semdangtsü tuyuba nung shilem ka ama pai Nagaland semdang ta Union Minister Oram-i ashi.

Indisen nung alirtemi DPR dang nungi tuluba hall yangluba nung shilem agiba atema tenüngsang agütsür ta pai ashi.

"Dharti Abba Janjatiya Gram Utkarsh Abhiyan ya October 2024 nung tenzüker aser iba ya lisopurtem lokti aser rongsenketzung jenjang ajungkettsü atema tenzüker lir. Iba scheme ya states aser Union territories 30 kübok districts 549 aser blocks 2,911 nung inyaksü" ta Union Minister Oram-i ashi.

"Nagaland nung district 16,

blocks 74 aser yimtsüng 608 tashi iba scheme kübok adentsü. Ministry-i Nagaland nem maximum facilities agütsütsü merangtsü" ta paisa ashi.

"Iba scheme atema Rs. 79,156 crore lemküka lir aser iba nung central share Rs. 56,333 crore aser state share Rs. 22,823 crore lir. Iba scheme ajanga social infrastructure, health, education aser livelihood nung teyari agütsütsü aser line ministry 17-i mapa balala inyaksü" ta Oram-isa metetdaksü.

Union Minister Oram-isa tanü online ajanga Lake View colony, Dimapur nung Community Hall ka lapoktsü.

"Iba ama community hall yanglutsü atema senotsü kanga ajema lemkütsü saka nübertemi teyari agütsüba ajanga mapa tuluba inyaketoggo. Lokti ka nung telongjem lira ajak takoktsü ta iba ajanga tanga yimtsüngtem dang tansütsü sayur" ta Tribal Affairs and Election Advisor Tovihoto Ayemi-i ashi.

Iba fund agütsütsü mulungba aser ki lapoktsüba atema Union

Minister dang kanga pelar aser village council-i mapa meranga inyakba atema pelaba shisemer ta Tovihoto-isa ashi.

"Iba hall ya lungro ajanga yangluba dang masü saka teimla aser telongjem tejakleni aoba tamaitsü sayur. Ministry-i senotsü teyari magütsü asübo aser lisopurtem ajungkettsü atema mapa meinyak nungbo iba ya pungmang ka dang süla" ta Labour & Employment, Skill Development & Entrepreneurship Advisor Moatoshi Longkumer-ia ashi.

Iba community hall ajanga yimertem aisü nung ajangzüksü aser lokti adenshidak asütsü ta paisa ashi.

Advisor Moatoshi-isa Union Minister Oram nem amphitheatre ka yanglutsü tezüluba ka agütsü aser tan financial year nung mulunga agizüktsü imlar ta ashi.

Iba senden nung district tekolakurtem, department ketdangsurtem, Advisor Moatoshi Longkumer, Advisor H. Tovihoto Ayemi aser tangartem aden.



Yaküm 2023 küm December 12 nü Mokochung district kübok Kangtsüng nunger lushi telongi Assam Police aser Assam Forest Department purtem aiter süngo lu aser jen raksatsüba sülen ano taküm 2024 küm-a April 25 nü Assam police aser Assam Forest Department purtemisa kasa tesem nung Kangtsüng nunger Süptsüyonglu leni aoba alu lenmang JCB amshia tudanga yutsüba osang meteta Nagaland nungi Tuli SDO(C) aser Assam nungi SDO(C) Nazira külem ser July 19, 2024 anogo nung repranga aodang alu lenmangji tudanga yutsür Süptsüyong lu nungji ali hectare 28 shi nungbo, joko, Assam Police Commando Training Center lapoktsü kiojen yanglua liasü. Iba osangji angashia October 15, 2024 nü Nagaland Deputy Chief Minister, Y. Patton den Tuli A/C nungi adokba MLA, Wb. A. Pangjung Jamir, Nagaland DGP aser Tuli SDO(C) nungertem iba tesemji tsüngdong tonga orr reprangba noksa nung angur. (Tuli, October 15,2024)

Kohima nung SSS kübok ananü training tenzükogo



Kohima, Mongputeni/Oct. 15 (TYO): Directorate of Economics & Statistics indang Conference Hall, Kohima nung Support for Statistical Strengthening (SSS) Sub-Schemes on Forest and Forest Product in Nagaland, Time Use Survey in Nagaland and Income Disparity in Nagaland kübok anogo ana training October 15, 2024 nü tenzükogo.

Iba training nungya District Statistics Officers (DSOs) 55 den Department of Economics & Statistics nungi field staff tem dentagi, koba October 21 nungi November 30, 2024 tashi agitsü aliba survey asem asoshi lir.

Forest and Forest Product indang survey ya GSDP estimation atema arem indang jenjang asadangsü asoshi lir; Time Use Survey ya nisung kati anogoshi maparen balala inyaktang mapang komang indoker ta asüba tejangja metettsü atema aser tasembuba survey Income Disparity yagi district balala tsüngta income balala aliba jangjatsü atema lir.

Akunu S. Meyase, Secretary to Government of Nagaland,

Economics & Statistics and P&AR ajanga iba training tenzüka jembidang, "Survey asem ya atongtepa agitsü, anungji iba training yagi surveyors tem tajungtiba lenmang nung data bendentetsüsa yaritsü imlar," ta ashi.

Lai training agirtem dang data tem ochishia bendentsü ayongzük aser iba amala data bendenba nung ajemdaker sorkar, sendaktepa aliba department tem, research agir aser dangar temi maparen balala inyaker ta ashi.

Nagaland nung data bendentsü ya mapang talangka tebilemsü tulu liasü, saka tang tenzüksü aliba sentong yagi item ajakji melenshia data shidak bendentsü imlar, ta lai ashi.

Neidilhou Keditsu, Director DE&S ajanga o tatsüka jembidang, data bendentsü tang ya mapang tetemsü lir, ta ashi.

DE&S ajanga survey aika agiogo aser data tajung bendena lir, anungji department ketdangsürtem dang pelar, ta pai ashi.

"Linük nung statistics aser

data bendenba tsütsü tajungtem rongnung asenok dena lir," ta pai ashi.

Survey asem ya kanga tongtipang lir, aser sorkari sentong shidak yanglutsü mechi district officers aser field staff temi data shidak bendentsüla, ta pai ashi.

Keditsu-i DSO aser statistical officers tem dang temulung agüja data bendentsü ayongzük.


Charles N. Kikon, Additional Director ajanga iba survey inyakyim tongmelang agi rasaa ashi aser SSS Sub-Schemes kübok iba training ya tatem alitsü ta metetdaksü.

Sentong nung Deputy Director Vikosieto Krose menden liasü aser ESO Dr Tumbenthung Y. Humtsoe ajanga melepzüng o jembi.

Anogo ana training atema shisalen sayur ya Economics & Statistics Officers (ESOs) Kiutan Simon, Sevosalu Resu, Dr Tumbenthung Y. Humtsoe & Ingauzeule Kenrang; Deputy Director Vikosieto Krose aser Inspector of Statistics M Renchio Murry nungertem alitsü.



Indian National Trust for Art & Cultural Heritage (INTACH), Nagaland Chapter ajanga Classes 7-10 nung azünger asoshi INTACH Heritage Quiz Competition ka Don Bosco Institute of Development & Learning nung October 15, 2024 nü ayongzük. Iba tetoktepa nung Dimapur nung aliba Hollotoli School, Bethesda Hr. Sec. School, Christian Hr. Sec. School, Holy Cross School, Ram Janaki Hr. Sec. School, St. Mary's Hr. Sec. School nungi kaketshir 56 arua shilem agia liasü. Dimapur City Round nung Ram Janaki Hr. Sec. School nungi Class 10 nung azünger Nitish Kumar Das aser Rohan Das nati takok angu aser tena ya Guwahati nung agitsü aliba Regional Round nung shilem agitsü aser yangji takok ngura Delhi nung National Round nung tokteptsü.



NAGALAND POLLUTION CONTROL BOARD

Signal Point, Dimapur - 797112, Nagaland
Tel: 03862-245727, TeleFax: 03862-245728
Website: www.npcb.nagaland.gov.in e-mail: npqb2@yahoo.com

AMBIENT AIR QUALITY FOR KOHIMA AND DIMAPUR CITY

KOHIMA ASER DIMAPUR NUNG MOPUNG MERÜK-MEMERÜKBA JENJANG

Sl. no	City	Location of air station	Type of area	Monitoring date 08.10.2024	Permissible limit As per the National Ambient Air Quality Standards "Iba tasazük alemabo metudaksütsüla"
1	Dimapur	Bank Colony	Residential	74	100 µg/m³
2		Dhobinala	Commercial	97	
3		NPCB Office, Signal Colony	Residential	41	
4		Tenyiphe, Chumoukedima	Commercial	40	
5		Nagarjan	Residential	52	
6		Viola colony	Residential	41	
7		Burma camp	Commercial	74	
8	Kohima	Opposite NST Office	Residential	39	
9		PWD Junction	Commercial	60	
10		High School Junction	Commercial	72	
11		Midland (Upper)	Residential	38	
12		Forest Colony	Residential	24	


Iba osang ya nübertem ajangzüksü atema Nagaland Pollution Control Board-i agütsür.

OFFICE OF THE
RIONGSANGER PUTU MENDEN KELINGMEN
P.O. Changtongya - 798613, Dist. Mokokchung : Nagaland

SANGDONGER


1st Oct 2024 Tir Yimyim paper adok nung koba Kelingmen aser Asangma Yimden ana tenüng nung sangdong ka agütsüa ali, ibaji 23rd Sept.2024 anogo nung yimden ana külemi mena renemba ama masü. Iba dak sendakbaren nung masüba nung council Chairman-i mangatetepi sign sür yokba atema pa dak tapet temerenshi inyakogo, anungji yangji ni Kelingmen Yimdenbo madener ta tanü anogo nung meyiptsür ta sangdonger.

I. MEREN



Council Chairman
Village Council
Kelingmen

L. PENDANG J.R.



Secretary
Village Council
Kelingmen

NECTAR project aser NBSE lungjemer workshop agütsür Dimapur, Mongputeni/Oct. 15 (TYO): Shisaliok tsütsü 'Strengthening Evaluation Practices' indang ananü temulung nung züngoka ayutsü asoshi tanen makai azüngba aser sayuba melen higher order thinking skills (HOTS) dangi meyiptsü nukjidong nung NECTAR project ajanga NBSE den lungjemer Exam Reforms component kübok evaluation practices tashi itshitsü asoshi maparen balala inyaktar.

Iba sentong mapa kuma inyaksü atema NECTAR project ajanga Educational Initiatives (Ei) ya amshir. Iba dak sendakba nung

State nung overall evaluation yimya tajungba kumdaksütsü mechi iba workshop nungya government aser private school tem nungi Classes 9 aser 10 atema subject pezü asoshi examiners aser head examiners 147 nem training agütsütsü.

Workshop ya Directorate of School Education aser NBSE office, Kohima nung agitsü aser October 16, 2024 nü tembangtsü.

JKTM-i tzükong nung school tia asadanga jaja



Jangpetkong Kaketshir Telungjem Mungdang (JKTM) tiri anir ketdangpurtem October 3-4, 2024 anogotem Jangpetkong nung aliba school tem semdanga jasadang tangokba noksa ka angur.

Dimapur, Mongputeni/Oct. 15 (TYO): Jangpetkong Kaketshir Telungjem Mungdang (JKTM) tiri anir ketdangpurtem October 3-4, 2024 anogotem Jangpetkong nung aliba school tem semdanga jaja liasü.

Iba mapang tesayurtem den mensem mena school dak sendakba maparen aser tebilemsü tem lemsatepba den külemi tetsü oshi wazüka ayutsü nukjidong nung school-i shilem agitsü maparen kar tesayur den lemsatep.

Sensaksema mapang school nung Ao tesayur (Language teacher) maliba ajanga tanurtem tetsükdaksü ajuruba aser tim atemba ashi.

Tetsü oshi tejakleni renloka aotsü nukjidong nung asen Aor lokti balala ajanga maparen inyakba mapang ka nung tanurtem angazükdak tesem ka nung pei tetsü oshi asoshi tesayur maliba ajanga takoksa tulu anguba ajiteta kanga nemjema bilemer, ta JKTM sangdong ka ajanga ashi.

Government school aika



New Delhi nung ITU World Telecommunication Standardization Assembly lapokba mapang Ato kilonser Narendra Modi tangokba noksa nung angur.

Maharashtra, Jharkhand elections, by-polls Nov 13 nungi 20 tashi agitsü

New Delhi, Mongputeni/October 15 (Agencies): Maharashtra aser Jharkhand nung Assembly elections aser Kerala nung Wayanad aser state balala nung assembly constituency 48 densema Lok Sabha menden balala atema by-poll November 13 nungi 20 tsüngda agitsü ta Election Commission of India (ECI)-i Mongolbarnü metetdaksüogo. Election atema result ya November 23 nü sangdongtsü. Maharashtra nung election ya kenüyongi dang November 20 nü agitsü. Kasa mapang nung Jharkhand nung election November 13 aser 20 nü agitsü aser Wayanad nung November 13 nü agitsü. Congress lenir Rahul Gandhi-i Wayanad Lok Sabha

menden aser Uttar Pradesh nung Rae Bareilly Lok Sabha menden naprongla akokba sülen Wayanad menden toktsüogo. June ita Congress-i Priyanka Gandhi Vadra Wayanad menden nungi tang mezüngbuba tokteptsü ta sangdonger liasü. Tang Jharkhand indang assembly term ya Janury 5, 2025 nü tembangtsü. Hombarnü Congress-i, parnok Jharkhand assembly elections nung chief minister Hemant Soren-i aniba ruling Jharkhand Mukti Morcha den longjemer tokteptsü ta sangdongogo. Party ana tsüngda Jharkhand assembly election atema menden lemdangtsü asoshi tatembangbuba telemtetba ka

yakta agitsü imlar. Kasa mapang nung Maharashtra nung assembly menden 288 nung election November 20 nü agitsü. Taküm iba election atema tongtibang political alliances—Maha Vikas Aghadi (MVA) aser Mahayuti na tang mezüngbuba tokteptsü renemdar. Maha Vikas Aghadi alliances nung Congress, Shiv Sena (Uddhav Balasaheb Thackeray), aser Sharad Pawar lenisüba nung Nationalist Congress Party (NCP) densema lir aser Mahayuti alliances nung Bharatiya Janata Party (BJP), Eknath Shinde-i aniba Shiv Sena faction aser Ajit Pawar-i aniba NCP faction densema lir.

Predator drone 31 alitsü atema India aser US na nangzüktepogo

New Delhi, Mongputeni/October 15 (Agencies): Government-to-government framework ka kübok India-i US defense major, General Atomics dang nungi Predator drone 31 alitsü, ta ketdangsurtemi Mongolbarnü metetdaksü. Linük ana tsüngda mapang talangka nungi yongya aliba tenangzüktepba tanü yangluogo. Indian Navy atema Sea Guardian drones 15 aser Indian Air Force aser Army na atema Sky Guardian drone titi alitsü. Sen crore 32000 alang tenangzüktepba kübok maintenance, repair aser overhaul facility India nung amenoktsü. Iba tenangzüktepba ya ketdangsur tejentem matsüngdang sign süa liasü. Cabinet Committee on

Security (CCS)-i Predator drones 31 alizüksü atema taoba hopta agizüka liasü. Iba tenangzüktepba yanglutsü atema America nungi military aser corporate ketdangsurtem India-i arua lir. Joint Secretary aser naval systems atema Acquisition Manager den India nung ketdangsurtem tenangzüktepba yangluba sentong nung dena liasü. Drone tem alitsü atema India aser US na küm aika sensaksema aruogo, saka hopta ishika tejakdang Defence Acquisition Council senden nungang tetsükdaksütem benteta liasü. MQ-9B 'hunter-killer' drone tem yagi armed force tem surveillance tashi taitba


kümdaktsütsü aser talisa China den arrtsü nung mangatettep adoker aliba tesemtem nung teyari agütsütsü. Taoba küm June ita Defence Ministry-i, government-to-government framework ka kübok US nungi MQ-9B Predator armed drone tem alizüksü temelaba agüja liasü. MQ-9B drone ya MQ-9 "Reaper" indang variant ka lir, koba Hellfire missile modified version ka yoktsü atema amshia liasü, koba ajanga al-Qaeda lenir Ayman al-Zawahiri, 2022 küm July ita Kabul nung tepseta liasü. High-altitude long-endurance drone tem ya ghonda 35 tashi tanen makai yimteter aser item yagi Hellfire missiles pezü aser bomb seret 450 shi benteter.

Siddique tepsetba ken o nung aija alir pezübuba puogo

New Delhi, Mogputeni/October 15 (Agencies): NCP lenir Baba Siddique tepsetba ken o nung aija alir pezübuba Mumbai Crime Branch-i puogo. Aija alisang arishi küm 23 tain Harishkumar Balakram ya UP kübok Bahraich tesem nung pua liasü. Pai nisung tepseterem nem senotsü aser tanga tenüngdakba teyari agütsüba atema puogo. "Baba Siddiqui tepsetba ken o nung Uttar Pradesh kübok Bahraich tesem nung alir Harishkumar Balakram (23) puogo," ta Mumbai Crime Branch-i Mongolbarnü sangdong ka ajanga metetdaksü. "Pa ya Pune nung scrap dealer ka ama inyaka liasü. Pa iba ken o nung densema liasü aser pai sen aser tang logistics tem agüja liasü. Ken o maneni bushisüngdangdar," ta kasa sangdong ajanga metetdaksü. Aija alir asem rongnung Dharmaraj aser Shivprasad Gautam na ya Balakram indang scrap dokan nung inyaka liasü. Iba lendong matalok tsüngda Harish-i, Shivprasad aser Dharmaraj na atema mobile phone tasen alija liasü. Police-isa, aija alir rongnung

pezübubai iba tatalokba indang jangja jangja meteter liasü, ta ashi. Police-i taoba mapang Siddique tepsetba atema Haryana nung alir Gurmail Baljit Singh aser Uttar Pradesh nungi Dharmaraj Rajesh Kashyap na puogo. Siddique akhar rongnung tasembuba Shivprasad samara bushiba mapang lir. Ken o nung densema alir Pravin Lonkar-a puogo. Pa adianu Shubham Lonkar, shibai Siddique ya Lawrance Bishnoi gang-i tepset ta social media ajanga shia liasü, pa-a samara bushidar. Iba social media post nung ashiba agi, Siddique ya Salman Khan den kanga junga sendaktepa aliba agi khaset. Iba post ajangsa nüburtem dang Salman Khan aser Dawood Ibrahim na nem teyari magütsütsü tekümdangtsü metetdaksüogo. Baba Siddique (66) ya Honibar aonung Mumbai kübok Nirmal Nagar tesem nung par jabaso MLA Zeeshan Siddique indang office kima nisung aseme khaseta liasü. Pa Deobarnü remogo.

Abdullah-i Oct 16 nü J&K CM mapa agizüksü



New Delhi, Mongputeni/October 15 (Agencies): October 16 nü Jammu and Kashmir chief minister tasenba ama tenangzüktepa agitsü atema National Conference (NC) lenir Omar Abdullah renema lir. Lieutenant Governor Manoj Sinha-i, CM mapa atema tenangzüktepba agitsü asoshi Hombarnü Abdullah jaokogo. INDIA bloc nungi lenirtem aser NC aser tanga party tem densema opposition front nungi lenirtemi iba sentong nung shilem agitsü imlar. Samajwadi Party lenir Akhilesh Yadav-a iba sentong nung shilem agitsü atema jelia arutsü akok ta ken o jangja alirtemi metetdaksüogo. DMK nungi Kanimozhi Karunanidhi, Sharad Pawar-i aniba NCP nungi Supriya Sule aser Shiromani Akali Dal nungi Sukhbir Singh Badal nungeria iba sentong nung shilem agitsü. Maharashtra aser Jharkhand na nung assembly election magi tsüngda INDIA bloc telongjem sayutsü atema National Conference-i, West Bengal chief minister Mamata

Banerjee, MK Stalin, Uddhav Thackeray, Sharad Pawar, Akhilesh Yadav, Lalu Prasad Yadav, Arvind Kejriwal aser D Raja nung ajak iba sentong atema jaokogo, ta source-i metetdaksü. Tawa tembangba J&K election nung NC aser Congress na longjemer menden 90 nungi 48 kokaogo aser parnoki sorkar tasenba kümtettsü. NC-i menden 42 aser Congress-i menden trok koka liasü. Election akokba sülen ajaki mulunga NC legislature party lenir asütsü Abdullah shimogo aser pai tang agi tanabenbuba Jammu and Kashmir chief minister mapa abentsü. Jammu and Kashmir LG Manoj Sinha Sinha-i Hombarnü, National Conference lenir Omar Abdullah dang Jammu and Kashmir union territory chief minister mapa abentsü atema October 16 nü tenangzüktepba agitsü jaoka liasü. Center-i Jammu and Kashmir nungi President's rule agiba sülen tang iba UT nung sorkar tasen ka tentettsü atema lenmang sadema lapoktsüogo.



Tamil Nadu Deputy Chief Minister Udhayanidhi Stalin-i Chennai nung Chepauk Triplicane kübok VP Raman lenmang aser iba den adonga aliba lenmang nung tzü intokba maparen asadanga noksa nung angur. Mongolbarnü Chennai aser Tamil Nadu kübok tesem balala nung tzünglu kanga sashia aruba ajanga lenmang aika metsüngogo.



TIR YIMYIM YIMOBILEM (EDITORIAL)

DIMAPUR RASEMNÜ, OCTOBER (MONGPUTENI) 16, 2024

Tamajung anemba ola

Napoleon Bonaparte-i ashi ama, alima ya nisung tamajungertemi raksar masü saka nisung tajungertemi tamajung anema ola madokba agi raksar. Iba o ji bilemdanga, kodang tanü asen lima tia ya medemdangdir, atangji, tanü asen lima raksaba, majungba aser tetsübu nem kokdaktsüba ya tetsübutü aser ochimashi mapa tamajung inyakertemi raksar masü saka asenok ama shirnoki peisasa nisung tajung, tangatet aser taremsük ta bilemer, item nisungtem jagi tetsübutü mapa tamajung inyakertem anema ola madokba agi tanü Nagaland tetsübutüka aser tetamatsüka raksatetogo ta angatetsü. Atangji, nisung tajungertemji tapi agi ola madoker masü parnok tebok sünga aliba agi ola madoker, kechiyong nisung tajungertem ajaki alima nung ya tebok atema dang alir amai bilemer. Item dangji azü ak ta ajatsü petpeter, kechiyong azü aser aktembo alima nung mapang tatsüka aliba ya tebok süngra mapa tatem ta ser alir. Aji oda, asenok kar ita sen agi, kar ayangba sen agi aser kar business tapu balala inyakba agi aser karbo tangar tenla agi chiyong mati alibaji ita anü petinu atong amai bilemer. Aji agi tanemi kidangbo nungsen jembir saka yimjak nungbo ola madoker ta asenoki asenoksasa tepuokdak alir ama küma liteper. Asenok karibo telong nung alirtemi tashiyim agi sen meshiba agi, nisung pua bener aoba agi aser nisung tepseta endokba agi asen lima tensa mejungi akümer ama bilema alitsüa akok. Ano asenok nisung tajungertem rongnung karibo asen lima ya government nung yimsüsür aser tulurtemi nübortem meyong tagitarutsü ajak okshia agiadokba agi Nagaland majunger amai bilema alitsüa akok. Ajisüaka, item jagi masü, Nagaland raksaba ya item tamajungtem anema asenok nisung tajunga ta bilemertemi ola madokba agi raksar. Ajisüaka, asenoki ngua asen akoksatsüsa tamajung inyaker ser nung asenoki ola madokbaji tajung tazü masü, asenok ya suwar aser tamachi asü (?) mesüra tetsübuokba agi tasü peleter ola madoker? Kong aser kodang südirsüaka tamajung mapa anema ola madokba jagi asenok ajangzüksü masü saka lia-liabo, tsüraburtemi jembir medem, auer süngsü tuluba kümadoktsü. Aji oda, asen meyong temeten aser asen meyong rongsen rakzüka bener aoer ser nung, itemji anema ola madokra, tamajungji asenok nungi jena aotsü masü saka tamajungtem jagi asenok mokseptsü. Idangjibo, office nung teberem kusüka mener anguba ita sen tamajungertem den lemsatapa agitsü, anogo piyong asentzösen sena inyaker aaba sen Tsüngrem shilem ter shilem dang nungi teimba nisung tamajungertem nem agütsütsüsa akümtsü. Aji oda, shishibo aseni shishir saka tagitsübo tangar meyong kümadoktsü. Aji tamajungerji tai masü saka parnok mapa tamajung anema asenoki ola madokba ajanga parnoki asenok mezüngmeshir asütsü. Aji kecha tesüngmangtsü mali, ola madok suwasolemer nüken shibai tsübutü? Iba amai tamajung anema asenoki ola madoktet tashi tamajungertem dang nungibo tajungertem tuluba akoksatsü. Ashi, asenok nisung tajunga ta bilemertemi tamajung mapatem anema ola sashi-sashia adok nungbo tamajungertema melenshila aser asen lima ya tereprangtsü nunga topur kanga junga kümla. Atangji, tangbo lanur tajungtem aikati ola madok aremer maremtet ola adok tenzükogo. Iba ola jagi nisung tajung-tamajungertem ajak ajangzüksü, kechiyong tamajung mapa anema ola adokba jagi tamajung inyakertem melenshitsütsü aser tajung inyaktsüburtem tetsübu aser tarendak kecha mali sademsadema mapa tajung inyaka aotsü. Aji oda, mapa tamajung anema ola adokbaji mapa tajung lir. Iba mapa tajung nungji tulu tila, takar sensaker, par kin, par yimer ta mali ajak adentsüla, kechiyong tamajungibo kecha kin aser kecha yimer asoshia tajung meinyaktsü. Joko, asenoka shitakba suwar asoka mesüra asen kidang tsübuseta malitsüsa aser aseni züsentetba aseni achitsüsa tamajung, tashiyim aser ochimashi mapatem anema kimai alutsüla aser ola adoktsüla. Tamajung anema tajung asoshibo sen tajungibo tasüa majem ola adoktsü tim.

OLEMSABANG

Nenoki Tsüngrem Aser Rongsen Metenzüktet (Mathi 6: 24)

- S. Aosüngküm Ozüküm

Kechiba iba lai nung asenok dang Tsüngrem aser rongsen na külemi metenzüktettsüa ta ashir? Aser kechiba ashir ta laishiba azünger ajaki pei mulungjang nung asüngdangyaa alitsü südi. Sürabangla rongsenji tamangertem asoshi Tsüngrem ama külemtsüsa kibur ka asü? Kechiba Tsüngrem den rongsen medemdanga jembir? Laishibai ashir "Sen ya temenen tera ajak tetenzükdak. Oda taküm nung senji nüngtak saka talila bushiloka aodang asenoki Tsüngrem amadoker aser Pa melena senji kibur kümdaktsür ta ashirba. Iba jagi asenok dang Tsüngrem tenzükdi süra aser chichia amangdi süra rongsen meimba nungi pilaa liang ta shinür.

Kechiaser alima nungbo rongsen dak tashi tulu lir asünungji aser nisung ajaki ibaji arishir aser rongsenji kibur ka ama kümdakja tenzükba agi laishiba nung Tsüngrem tenzükertem dang aser tamangertem dang tenzükdi süra aser amangdi ta süra bentet benteta amangtsü aser tenzüktsü tekümdangtsü ashir ta angateter. Saka tangarji odang tokjang asen Aotsür Aor tamangertemi ya khen aroka shisadangtsü kanga nungdaka kümogo. Kechiyong asenoki Tsüngrem o kanga aroka metet, tanela tejangrabaa lir, asüngteta liyonga aruogo südi, oda ajak dak alaker Khrisrta yimsü aseni tama agizüka ta nülak songtepa jembiba kin, tanü asenok kechi akümer? Asüng lanu putu kechi tia nung yutsütsü asameyanger? Asüng ser yanü parnok tangar den atongsema lia aodang kechi langzüksü renema yutsür? Saka alima tsütsülen tenzükertemji khen nemdaka yutsür, Tsüngrem tenzükertemi tarutsü lima tasenbaji penzüdang tang aliba lima mapayur no? ya raksaa yutsür mesüra menena yutsür manguba lima ka indang jembijen jembibaji tongtetdima? Kechiba süra tanü Tsüngrem tenzükertem aikati rongsen den külemi Tsüngrem tenzükndang aser tenzüktsüsa akümdang rongsen tashi nem kokdaktsüba aser tanela tenük pokaadokba angudang nenoki jembiba aser inyaka sayuba na khenyongi meputeper. Ne tenüng temai madokra na Tsüngrem rongsen mashilen amashiba nungi jenbua aliasü? Pei sünütsüsa lokti meyong rongsen madak kibur akümbaji laishibai melar asü? Tsüngrem tenzükerti arok meyong rongsen nung kibur akümtsü merandang tanela lu ayimtsü amadoker aser Tsüngrem sentsüwangshi donga meinyakteti aibelen aser maaksü nung tembanger ta metetdi. Saka Yisui ashiba ama "Saka ajakbo menen masü" kari aibelendang tangar den amsemer dangashi. Ano Mungdang nungi tenzükertem lim arogotem osangji kodang angadangdir oda langka nungbosa mangatettep, mulungmachi indang jembia angashir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arogo lenirtemi India nung Dalit Khristan temeden asoshi nokdaker



Züngsem 15 agi kumtetba Church delegation kati October 12, 2024 nü New Delhi nung Justice Balakrishnan (tiyong) den ajurutebpa noksa nung angur.

New Delhi, Mongputeni/ Oct. 15 (Agencies): 1956 aser 1990 kum Article 341 nung amendments kar ajanga Sikh aser Buddhism yimsü sülen anidakba Dalits nem Scheduled Caste jenjang agütsüba ama Khristan yimsü amangba Dalits nema kasa temeden agütsütsüla, ta Dalit Christian organisations ajanga tentetba telok kati takhangba agütsü.

All India United Christian Movement for Equal Rights (AIUCMER), Telangana United Christians and Pastors Association (TUCPA) aser senior bishops temi anir iba telok yagi Honibarnü Delhi nung 2022-K.G. Balakrishnan Commission chairman aser taoba Chief Justice of India K.G. Balakrishnan ajurua liasü.

Commission yagi kum tatemlen par report agütsütsü lir aser parnok yagi Buddhism aser Sikhism dak alaka danga tamangba yimsü dangi meyipba Dalits nung Scheduled Caste jenjang ya agütsütsü asü masü ta asadanger.

Parnoki tezüluba agütsüba nung Article 341 (1) indang amendments nung Para 1 aser Para 2 nung Constitutional mandate agüja aliba ama lir saka Para 3 nung "Temalen telemsa agüja liaka" aser Scheduled Castes ya tamangba yimsü ka nungi dang asütsüla ta shia aliba ya kin balala tsüngta bensaa amshiba lir. Iba yagi tamangba yimsü nung ajemdaker bensaa amshir, maongka kasa magütsür, ta parnok i ashi.

Mandal, Kaka Kalelkar, Justice Ranganath Misra ama Commission balalai Khristan yimsü densema danga yimsü dangi temulung meyipaka Scheduled Castes kasa alitsü ta ashir.

Züngsem asem agi kumtetba Commission, kong Ravindra Kumar Jain aser Sushma Yadav nungera lir, parnok i Telangana aser Andhra Pradesh nung iba ken o yimjak nung jembitsü.

Commission nem tezüluba

agütsüdüng AIUCER tir Jose Daniel, TUCPA nungi Goneh Solomon Raj, Bishop Veeraji Panta Israel, Dalit Christian Movement nungi M. Prabhu Kumar, Babu Rao, Antony Raju Thumma, Norbat, Libania aser dangartem liasü.

India nütsüng yongsük 1.4 billion aliba nungi million 201 bo Dalit nung aser India nung Khristanpur million 25 aliba nungi shilem 60 jungnüa Dalit aser tribal nungi jakzüka lir.

Dalit nung ya four-tire caste system nung medendaktsü aser untouchable ta züngshi. Saka 1955 kum ozüng ka yanglua 'untouchability' ya ozüng alema inyaksangshiba ka ama kumdaktsü, saka yimya balala

tanü tashi amshir.

Ajisüaka tesüiba kum 70 dak tema sorkar balala melentepa arudang Dalit nungi jakzüka Khristanpur aser Muslim nung nem teyari magütsü arur.

Indian constitution ajanga Dalit nisungtem nem teyari balala agütsür, koba dang Scheduled Caste ta ajar. Aser teyari nungya mapa, sorkar meyong kakat reju aser legislative bodies nung shilem balaka mekazüka yutsüba dena lir.

Ajisüaka 1950 kum tir ajanga totuyuba ka agütsüba nung teyari ya Dalit Hindu nung atema dang wazüka yutsü. Iba sülen iba totuyuba ya anaben yanglushia Sikhs aser Buddhists inoksem.

Kamala Harris-i North Carolina tekülem kidang Tsüngrem o jemb

Greenville, Mongputeni/ Oct. 15 (Agencies): US Vice President Kamala Harris ya Tsüngrem tenzüker tajung ka lir, ta Greenville, North Carolina nung aliba Koinonia Christian Center Church tenzüksang aser senior pastor Bishop Rosie O'Neal-i Deobarnü ashi, kong lai arogopur den Galatia 6 nungi jembia liasü.

Harris ya Democratic telok nungi US tir asoshi tokteper, koba November 5 nü vote agütsütsü lir, aser lai timtem mapang tamangertemi tayongzüka balala ajangshiba indang jembia liasü.

Tawa yipru tesashi ajanga North Carolina aser Florida state tem nung teraksa jenti bena arutsüba indang lai lemsatepa liasü.

Tawa Hurricane Helene aser Hurricane Milton ajanga sen dollar billion aika jenjang teraksa bener arutsü aser talisa North Carolina anüolen America nungera aika takum sama.

"Iba ama tensa tia nung asenoki asen tamang nunga tasüngdangba arur, aser asen tenük agi anguba sülen teimla samar," ta Harris-i ashi aser iba arogo nung la shilem agidaktsüba asoshi lai pelaba lemsatepa liasü.

"Iba ya ajanga kü

mulungjang aser tanüla nung tesunep angur," ta lai tekülem sentong asoshi ashi.

Harris-i lanuwa Oakland, California nung aliba 23rd Avenue Church of God nung tamangba yimsü angazükba aser tanur indang choir nung ken atenba indang jembia liasü.

"Laishiba asenok dang mapa tajung inyaksü tsüboa malitsü sayur, kechiaser mapang tetemsü nung asenoki temoatsüji agitsü. Ni tanur asüdüng Oakland, California nung aliba 23rd Avenue Church of God nung Galatia tabu nungi Tsüngrem o mezüng angashi, kong ni tanur indang choir nung ken tena Laishiba tesayuba mezüng angazük," ta Harris-i ashi.

"Iba mapang Tsüngrem temeim indang sayuba angazük, aser iba Tsüngrem yagi asenok dang mejembitet asoshi jembitsü ashir, sensaker aser nungdabapur temeden asoshi nokdaksü ashir. Anungji ni tanur asüdüng tamang ta asüba ya mapa inyakba ka lir ta angazük. Ibai asenoki mapa agi inyaka sayur," ta lai ashi.

San Francisco nung aliba Third Baptist Church indang pastor Rev. Amos C. Brown-i ochi asoshi inyaksü, taochi sayutsü aser asen Tsüngrem

ANOGO ABEN TSÜNGREM DEN

Khrista nung aliba

"Kechiaser Khrista den ni kangki nung angenlokogo, aser ni joko taküm mali, saka kü dak Khrista taküm alir aser Tsüngrem chir, shibai ni meim aser pei sasa ni atema taküm tenla agütsü, pa dak tamang agi ni taküm alir" (Gal. 2:20).

Mamanger ajak dak temenen jakla yimya keta lir. Na Khrista dangi marudang ne daka iba jakla yimya keta liasü. Na temenen nisung ka kechiaser temenen menatsü yimya ne dak keta liasü. Iba yimya nisung jagi Tanela mapa angatetsü makok (1. Kor. 2:14).

Tekümtet angu dang ne tejenba taküm dak kechi atalok ? Na asü- ne temang masü, saka telung nung tejen yimya koba Adam nungi aruba senmang liasü, aji asü (Rom 6:2-6; Ko1. 3:3). Iba tepsetyimji kechi ? Kangki nung Khrista den asüba (Gal. 2:20). Khrista kangki dak alema kecha moulutsü ta Pauli ashi (Gal. 6: 14). Tekümtet ajanga na Khrista nung lidaktsü, shiba ne menen atema kangki nung asü. Khrista nung aliba ajanga ne tejen taküm kangki nung pa den süogo.

Adam nung na temenen yimya keter liasü (Ef. 2: 1-3); Khrista nung na Kibuba den shilem agir aküm (2 Peter 1:4).

Adam nung na shi nung liasü (Rom 8:8); Khrista nung na Tanela nung lir (Rom 8:9). Adam nung nai shi sülen jaja; Khrista nung na Tanela sülen sülen jajar.

Khrista nung taküm tasen ka alitsübaji koda tepelatsü ! Yisu, Nai ni temenen talenba nungi salatsüba asoshi ne tenüng asanger. Amen.

den ajemalua jajatsü ashiba lai bilemteta jemb.

"Ochi ya mapang ajak nung tongtipang lir, talisa lendong timtem mapang kanga tongtipang lir. Talisa tang asen linük tesem ajungalen yipru ajanga teraksa jenti agütsür aliba mapang nungdaker. Aser Hurricane Milton aser Hurricane Helene agi kongshir alirtem dang temeim sayur ajunga kü kinungbo Doug künati sarasadem nung bilemteter aser item yipru agi kongshir alir asoshi bilemer," ta Harris-i ashi.

Yipru tesashi aruba mapang tasü tait mapa tajung inyakba aser nüburtem tsüngta yaritebpa indang lai jemb, talisa Hurricane Helene ajanga tzümetsüng nung tetsür ka lar ki yutsür moteti aliba Eddie Hunnell-i kumzüka indang lai ashi.

Hunnell ya Grassy Creek, North Carolina nung par jabaso kiyimba sentong nung adeni aodang kanga keraa tzü metsüng tenzü. Tzümetsüng yagi anasa ki ka nung kibur Leslie Worth dener ponger ao. Lar ki metsüngzüka aoba tetsübo nung repranga alidang Hunnell oa Worth ya kumzü.

Nisung kari yimtenren tsütsü tajangzü angutsü mechi osang tiazü prokshir aser dangari

lendong timtem ajurua aliba tenüng amshir, saka laibo Hunnell indang otsü amala tali temabai ajungkettsü meranger, ta Harris-i ashi.

"Ni Eddie den pa tasü tait mapa indang jembidang 'Ni la oa kumzüksüba dak alaka lenmang kecha meliasü' ta pai langzü. Atangji nung pa asoshi danga lenmang liasü... Saka pa asoshi lenmangji dangar asoshi takum bendanga agütsüba ya liasü. Isaia nung shia aliba ama nungdabapur timtem nung alidang pa dak jenokdaksü. Pa ajanga asenok ajak külemi lir ta angatetdaksür," ta Harris-i ashi.

"Yipru tesashi mapang ibaji shidak süra, yipru süyiba sülena ibaji shidak lir. Ibaji asen takum nung teti shidak lir. Paul-i Galatia nung aliba arogo dangi shiti züludang mapa tajung inyakba nung tatidang arutsü khuret par nüburtemi bilemtsü akok ta pai meteta liasü," ta lai ashi.

"Saka parnok dang aser asenok dang mapa tajung inyaksü tsüboa malitsü Tsüngremi ashiba Paul-i jembir, kechiaser asenok ajak dak tashi lir. Asen dak tashi aliba ya mapa tajung inyaksü asoshi lir ta Tsüngremi asenok dang ashir. Aser iba tashiji asenoki dangar yariba mapang tejangja angutsü."

AO OSHI ANGAZÜKDAK:



Tanüktari

(n) anüngalu, tulu-tulu shima agir toktsüba (leftovers)

* Lokti chiyonger tanüktari ajak tanurtemi bener ao.

Tanüla

(adj) tzü agi süsüa kümdaktsüba (slippery)

* Makokba lenmang tanüla nung ajutoker alang.

OLONG PAITEP # 6953

Grid for Olong Paitep # 6953 with numbers 1-17 in various cells.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S ___ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6952 TELANGZÜBA

TIPIEN :

- 1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
5. Lenti, 7. Tajangzük,
11. Teronem, 12. Sempa, 13. Jahaz.

NAI-A YA METETTER MA



Swiggy-i Singham Again film yanglurtem den yaritepa Guinness World Record tasen ka yangluogo. Swiggy-i "largest vada pav delivery in a single order" otsü yangluogo aser iba ya Robin Hood Army ajanga teyari agüja school tanurtem nem 11,000 vada pavs lema agütsü.

GMCH nung HIV-positive kati azü ayokba putet



Guwahati, October 15, 2024

(Agencies): Gauhati Medical College Hospital (GMCH) nung tiyongtsü nung inyaker ana apuba ajanga bushisüngdang tenzük. Tena rongnung ka tiyongtsü nung inyakerter aser ozüngi memelaba tetenlartem ajanga azü ayokba maparen ka putetogo.

GMCH nung HIV-positive nisung kati azü ayoktsü merandang apu aser iba sülen iba inyakyim temai adok.

Dhubri aser Mankachar nungi lanur aikati GMCH nung azü unit ka nung Rs 2,000 agi yokyonga aru. Iba mapa

tiyongtsü nung inyaker ana apuba ajanga bushisüngdang tenzük. Tena rongnung ka tiyongtsü nung inyakerter aser ozüngi memelaba tetenlartem ajanga azü ayokba maparen ka putetogo.

Iba nisung yagi ita ka tejakdang GMCH nung azü tenla agüja liasü aser iba ajanga nisung taküm aika lendongi idaktsüogo. Iba HIV-positive nisung azü ayoktsü merandang GMCH kettangsurtemi pa apu. Pa dang asüngdangya asü dang pai pa dak HIV aliba memetet ama

sayua liasü. "Ni memetet. Ni meteta ali asübo ni ioba mapa meinyakla" ta pai kettangsurtem dang ashi. August 24 nü iba nisung azü tenlatsü merandang blood screening ajanga "HIV-positive status" puteta liasü ta GMCH Superintendent Abhishek Sarma-i ashi. "Nisung kati azü tenalatsü atema arudang onoki magili ta mashir saka azüji HIV amala lir mali jangjatsü atema tetendangba balala agir. Onoki pa dak HIV positive putetba sülen azüji endok aser iba osang kettangsurtem dang ashi" ta Sarma-i ashi. Iba atema bushisüngdanga arudang Yunus Ali ta ser azü ayonger tongtii Sheikh dangi phone asü. Ali yagi azü yokdokba maparen kettangsüa inyak aser pai sen agütsütsü nangzük. Iba nung ajemdaker kettangsurtemi Ali aputsü bushir aser GMCH nung ozüng alema azü ayokba maparen nung sendaka alir ajak putettsü meranger

Vice-President Jagdeep Dhankhar-i Assam & Meghalaya semdangtsü

Guwahati, October 15, 2024

(Agencies): Vice-President of India Jagdeep Dhankhar will be on a two-day visit to Guwahati in Assam and Meghalaya's capital Shillong.

India Vice-President Jagdeep Dhankhar-i anogo ananü atema Assam aser Meghalaya semdangtsü.

Vice-President Dhankhar-i October 16, 2024 nü anogo ana atema Guwahati aser Shillong

semdangi arutsü. Pa den pa kinungtsü Sudesh Dhankhar arutsü.

Vice-President Dhankhar-i Mawdiangdiang nung Meghalaya Skill and Innovation Hub atema lung azünga yutsütsü.

Dhankhar-i IT Park aser Raj Bhavan Shillong semdangtsü aser paisa Meghalaya Chief Minister Conrad K Sangma aser tongti kettangsurtem den

ajuruteptsü. Dhankhar-i taoba nung IIT Guwahati nung 25th Convocation nung tongti tesemdanger ka ama shilem agia liasü. Paisa Assam nung tematiba State Civilian Awards agütsü. Pai Meghalaya aser Assam semdangba ajanga Centre sorkari Northeast renloktsü atema nangzüka inyakba tashi itshtsü imlar.

Manipur nung 'Black Day' ta ser ghonda 12 mokdang

Imphal, October 15, 2024

(Agencies): October 15 nü Manipur nung telungpurtemi 1949 küm India kübok state ka akümba anema ghonda 12 mokdangogo.

Iba sentong ya ASUK, SOREPA aser Coordination Committee (CorCom) ajanga ayongzük aser parnoki 'National

Black Day' ta ser among. Manipur kübok tesem aika nung iba mokdang ajanga kongshia liasü aser Imphal yimti nung shishilembadak ajak shibang. Tanü public transportation services teimba anen aser sorkar office tem nunga mapa inyaker maliasü.

Ajisüaka, medical emergencies, fire services, water supply aser religious events amala essential services mokdang kübok medendaktsü. Telungpurtemi 'National Black Day' amongba ajanga Manipur nung nisungtemi India kübok state ka akümba atema mepelaba sayur.



Mokokchung, October/Mongputeni 15(TYO): Süngratsü yimtsüng nung Medemsanger Putu-i küm 30 songtema yimsü süa arur kelen October 11 nü Mejsanger Putu nem Süngratsü yim nüburtem tiptema yimsüsüa anitsü asoshi yimsüsüba menden melenoktsüogo. Sobaliba yimya beshia iba sentong ya Senden Salang nung agi aser iba sentong nungya , Additional Chief Secretary & Finance Commissioner Sentiyanger-I Süngratsü lima tsüksüng onsünga lia aotsü indang tayongzükba o lemsatepa liasü. Iba sentong agir kelen Additional Chief Secretary & Finance Commissioner Sentiyanger (achichi nungi pungobuba) aser Jungli aser Mongsen yimsüsürtem den külemi tangokba noksa nungji angur.

Rara nung Russia yaritsü North Korea-i sepai yoker: Zelenskyy

Kyiv, Mongputeni/October 15 (Agencies): Ukraine den raraba nung teyari agütsütsü atema prangbong injang aser hadir balala agütsüba dang masü saka sepai dena yokba atema Ukraine tir Volodymyr Zelenskyy-i North Korea aitsüogo.

“Russia aser North Korea amala linüktem tsüngda tesendaktep tali kuma aoba ngua arudar,” ta Zelenskyy-i Deobar aonung ashi.

“Iba tesendaktep ya prangbong injang aser hadir balala agütsütepba kija masü kumogo aser North Korea nungi Russia nem teyari agütsütsü atema nisung dena yoker,” ta paisa shisem.

Pai ashiba agi, Ukraine aser allies tema Russia nung ter tesendaktep akangshiba den putepa jenjang agitsü nungdaker. Paisa, rara tuluba kuma meyoktsü atema military teyari talila agütsütsü atema maneni ayongzükogo.

“Front line nung teyari talila nungdaker,” ta pai ashi. “Ukraine nem long-range capabilities aser sepaitem nem rara melenshettsüsa hadir tongtibang agütsütsü atema jembiba ya military hadirtem indang list ka dang masü. Iba ya linük amakertem tali nongshitsü atema lirtenongshiba koba Russia-i mekoktetsüsa kanga tashi tait asütsü. Iba ajanga rara tuluba kuma aotsü aliba nokdangtsü,” ta Zelenskyy-i ashi.

Zelenskyy-isa Ukraine den sendaktepa aliba linüktem dang Russia nung military tamendakdak balala maka parnok tashi tajemba kumdaktsütsü atema longer-range missiles tem amshitsü asoshi parnok nem temelaba agütsütsü mepeshiba tang tashi temelaba monguteti lir.

Paisa, pai maneni iba temelaba angutsü atema merangangtsü, ta shiogo. “Chichiba yimjungji tashi ajanga dang ngutetsü aser taruba hopta tepeyong iba tashi asoshi onok den sendaktepa aliba linüktem den inyaksangshitsü, ajita asünung dang chichiba yimjung bener arutetsü,” ta pai ashi.

Anüolen aliba linük lenirtem taoba hopta Germany nung ajuruteptsü liasü, ajisüaka Hurricane Milton agi Florida kanga mejungi kongshiba janga United States tir Joe Biden iba senden nung mendentetsüsa aküm.

Kasa mapang nung South Korea indang Minister of National Defense Kim Yong-hyun-i taoba hopta ashiba agi, Ukraine den rara nung Russia nem teyari agütsütsü atema North Korea-i sepaitem yoka alitsü akok.

Paisa, Ukraine-i Russia-i atsünger aliba tesemtem amakba mapang North Korea nung ketdangsurtem tepsetba osang prokshiba ya shitak asütsü, ta ashi.

Russia-i iba osang ya tai ta shiogo. 2022 kum February ita nungi Moscow-i Ukraine amak tenzükba sülen North Korea aser Russia na tesendaktep kanga akanga kumogo.

North Korean Leader Kim Jong Un-i, 2023 kum September ita par linük toktsür oa Russia semdangogo. Pa train ajanga Russia anüdokleni ao kong pai Russia tir Vladimir Putin den sensak asem aser military base aser prangbong injang aser hadir balala yangluba factory tem semdanga liasü.

North Korean Leader Kim Jong Un-i, 2023 kum September ita par linük toktsür oa Russia semdangogo. Pa train ajanga Russia anüdokleni ao kong pai Russia tir Vladimir Putin den sensak asem aser military base aser prangbong injang aser hadir balala yangluba factory tem semdanga liasü.

Kasa mapang nung Putin-ia June ita Pyongyang semdangogo, koba kum 24 tsüngda pai North mezüngbuba semdangba liasü. Iba mapang Kim-i Ukraine den rara nung Russia nem takokba tashi teyari agütsütsü tenangzükba agüja liasü.

North Korea-i Ukraine den rara nung amshitsü atema prangbong injang aser hadir balala Russia dangi yokba atema US, South Korea aser Ukraine nungeri parnok aitsüogo, ajisüaka Russia aser North napronglai iba taittsüba ya magizüki arudar.

April ita United Nations sanctions monitors-i ashiba agi, January 2 nü Kharkiv nung poklokttsüba missile teraksa ya North Korean Hwasong-11 series ballistic missile ka nungi liasü.

Kasa mapang nung Kyiv-i ashiba agi, parnok indang sepaitemi hopta tatemi Russia telung nung Orenburg tesem nung amendkaer aliba military airfield ka nung Tu-134 transport aircraft ka raksatsüogo.

Maneni Russia indang human rights commissioner Tatyana Moskalkova-i ashiba agi, tanur 8000 shi densema nisung 30,415 shi arrtsü nungi aninogo, kechiyong Ukraine-i item tesemtem maneni maka arudar. Ano Russia kübok Kursk tesem nung Ukraine nung sepaitem adenshir aliba tesem ka nung Russia indang glide bomb tem poklokttsüba Russian defence ministry-i metetdaksüogo. Bomb tem ya Russia indang Su-34 warplane temi tsükdakja liasü, ta kasa sangdong ajanga metetdaksü.

Russia defence ministry-isa, parnok Ukraine anütoklen Mykhailivka yimsüng atsüngogo aser parnok Pokrovsk leni odar, ta metetdaksü.

April ita United Nations

Kasa mapang nung Putin-ia June ita Pyongyang semdangogo, koba kum 24 tsüngda pai North mezüngbuba semdangba liasü. Iba mapang Kim-i Ukraine den rara nung Russia nem takokba tashi teyari agütsütsü tenangzükba agüja liasü.

North Korea-i Ukraine den rara nung amshitsü atema prangbong injang aser hadir balala Russia dangi yokba atema US, South Korea aser Ukraine nungeri parnok aitsüogo, ajisüaka Russia aser North napronglai iba taittsüba ya magizüki arudar.

April ita United Nations sanctions monitors-i ashiba agi, January 2 nü Kharkiv nung poklokttsüba missile teraksa ya North Korean Hwasong-11 series ballistic missile ka nungi liasü.

Kasa mapang nung Kyiv-i ashiba agi, parnok indang sepaitemi hopta tatemi Russia telung nung Orenburg tesem nung amendkaer aliba military airfield ka nung Tu-134 transport aircraft ka raksatsüogo.

Maneni Russia indang human rights commissioner Tatyana Moskalkova-i ashiba agi, tanur 8000 shi densema nisung 30,415 shi arrtsü nungi aninogo, kechiyong Ukraine-i item tesemtem maneni maka arudar. Ano Russia kübok Kursk tesem nung Ukraine nung sepaitem adenshir aliba tesem ka nung Russia indang glide bomb tem poklokttsüba Russian defence ministry-i metetdaksüogo. Bomb tem ya Russia indang Su-34 warplane temi tsükdakja liasü, ta kasa sangdong ajanga metetdaksü.

Russia defence ministry-isa, parnok Ukraine anütoklen Mykhailivka yimsüng atsüngogo aser parnok Pokrovsk leni odar, ta metetdaksü.

April ita United Nations

April ita United Nations

April ita United Nations

North Korea-i South Korea den arrtsü anasa lenmang poksa

Seoul, Mongputeni/October 15 (Agencies): North Korea-i northern sections nung South Korea den sendaktepba lenmang poksatsüogo, ta South Korea indang military-i sangdong ka ajanga metetdaksü.

Linük ana lemdangba military demarcation line north len lenmang shilem kar terotu (03:00 GMT) nung poksaja liasü, ta Joint Chiefs of Staff-i Mongolbarnü media nem osang ka agüja liasü.

Military-i, kümdangshia alitsü atema demarcation line south len nungi injang khalokja liasü, ta kasa sangdong ajangasa metetdaksü.

Seoul-i Hombarnü sandong ka ajanga, lenmang kar poksatsütsü atema Pyongyang renemdar ta metetdaksür liasü.

North Korea yimtiba Pyongyang-i drone tem amshia propaganda leaflets tem yoker ta shia North-i kidanger linük aitsüba sülen Korean Peninsula nung tang tensa mejungi kümer lir.

Kasa mapang nung South

Korea indang military-i North nung lenmangtem poksaba indang video tem lemsatepa liasü.

Video ka nung military uniform semer North Korea nung sepaitem lenmang mepoksa tsüngda tripods nung camera inoker amenokyonga aoba ama nguogo aser iba sülen Gyeongui lenmang shilem ka poksatsüba nungi mokozi aser awi adokba video nung nguogo.

Lenmang poksatsüba sülen excavators temi lenmang atuba aser iba matsüngdang North Korea nung sepaitem military uniform semer mapa inyakba video balala sayuogo. Video tanga ka nung North Korea-i anütok tzükümlen Donghae lenmang shilem ka poksatsüba nguogo.

Iba lenmang ana ya mapang talang ka nungi shibanger liasü, saka ken o asadangertemi ashiba agi, lenmang raksatsüba tetezü South Korea den sensaksemtsü atema North Korea lenir Kim Jong Un tejangraba kecha maliba sayur. Drone dak sendakba ken o

Office of the
MONGSENYIMTI SENSO MUNG DANG
B.P.O MONGSENYIMTI; P.O. CHUCHUYIMLANG
DIST: MOKOKCHUNG ; NAGALAND-798614

ATSÜR

Naga Senso tajung rangbeni yimjung aser tesünep nung alitsü yimyim balala kinük ajak len nungi ayimba tensa ka nung 10th October 2024 anogo nung NSCN (Nikki Group) purtemi ozü Mongsenyimti Senso tajung ana pua bener aoba tashiyim mapa ozü sensosanger ajaki khukhua aitsür.

Iba tashiyim mapa inyakertem teküraba nung pua asen linük temzüng kübok tapet temerenshi agütsütsü bangdakpur dang akhanger aser iba dak sendakba ken O maparen ajak nung ochi phuküma Mongsenyimti sensosanger ajaki tatem tashi nokdaksü ta ayimoktsür.

Sd/-
Wb. Imotong
Tir, MSM

Sd/-
Wb. Obangonen
Tongti Zülur, MSM

OFFICE OF THE
VILLAGE COUNCIL MONGSENYIMTI
RIONGSANGER PUTU
MOKOKCHUNG; NAGALAND
P.O. CHUCHUYIMLANG – 798614

KHUKHUA AITSÜR

Asen linük kinük pezüsülen nungi nübur rangbeni putepa aser tesünep nung alitsü yimyim balala ayimba tensa ka nung 10th October 2024 anogo nung NSCN (Nikki Group) purtemi ozü Mongsenyimti Senso tajung ana pua bener aoba tashiyim mapa ozü Putu Menden-i khukhua aitsür.

Iba tashiyim mapa inyakertem teküraba nung pua asen lima temzüng kübok tapet temerenshi agütsütsü bangdakpur dang akhanger aser iba dak sendakba ken O maparen ajak nung ochi phuküma Village Council Mongsenyimti (Rionsanger Putu) ajanga tatem tashi nungitsü ta metetdaksür.

Sd/-
(AOSUNGIT)
Chairman
Village Council Mongsenyimti

Sd/-
(MAPUTEMJEN)
Secretary
Village Council Mongsenyimti

PUBLIC NOTICE

ICICI Bank Registered Office: ICICI Bank Tower, Near Chakli Circle, Old Padra Road, Vadodara- 390 007
Corporate Office: ICICI Bank Towers, Bandra-Kurla Complex Mumbai 400051

GOLD E-AUCTION CUM INVITATION NOTICE

Tsünglanglen shia aliba sen apur dang gold ornaments asoshi ICICI Bank Limited ("ICICI Bank") nungi ("Facility") sen apua aliba menoktsü metetdaksü. Ajisüaka parnok sen apua aliba memonoktet nung October 21, 2024 nü "pledged gold ornaments" ya E-Auction asütsüsa akumer. Jelia osang magütsü E-Auction anogo melenshitsü/account agentsü ICICI Bank dak tashi lir. Auction ya online ajanga <https://jewel-auction.procuretiger.com> nung anüngdang 12:30 nungi nikongdang 3:30 tashi agitsü. Terms and conditions tejangja atema agüja aliba website nung angutsü. Sen apur ya sür lira, senmanger den conditions ajak kasa alitsü.

Loan A/C No.	Customer Name
Branch Name: Imphalwest	
095905014123	Sentirenla Longkumer

Date : 11.10.2024
Place : Dimapur

S/d Authorised Officer
For ICICI Bank Limited

Kasa mapang nung South

Drone dak sendakba ken o

Imkongmeren Sports Complex nung MDFA Trophy 2024 asayadagi



MDFA Trophy 2024 tenzük dang tetushi tejaoker State Election Commissioner Wb.T.John Longkumer IPS(Retd)-i asayartem aser asayar meiner tila tanurtem den metetpelaa ajurutepa salem asüdang tangokba noksa nungji angur.

Mokokchung, October/Mongputeni 15, 2024 (TYO): Imkongmeren Sports Complex Mokokchung nung tanu nüburtan ajaki yongaa ataba MDFA Trophy 2024 mera ketketa tenzükogo.

Trophy tenzükba sentong nung Tetushi tejaoker State Election Commissioner Wb.T.John Longkumer IPS(Retd)-i jembidang asayartemi tajungtiba nung asaya-a takok angutsü merangang ,saka iba mapang nung tazüokba nung timi asayatsülata, asayaba mapang nung timi asaya na adenba telok, ner kiyong aser yim tenüng ajungketsü merangang ibaji ajanga Mokokchung nung iba MDFA Trophy asayaba ajanga Mokokchung town tali tobur junga kümdakjangta

asayartem ayongzükba ashi. Tetushi tejaokerisa adenshia aliba nüburtan dang pei meraba telokji noklang nung noklang saka ano iba kasa mapang nunga tangar telokjia semang aser Refreetem nungitang ibaji ajanga asayaba tobur jungdaksüba dang masü saka lokti aser alima dangi yimjung aser tesünep bener arutsütsüta ayongzükba jembi.

India nung nungtoko tournament "All India Junior Women's National Trophy" Dr.T.Ao nüngtem sütsüba asoshi Nagaland Football Association aser All India Football Federation dang tepelaba metetdakja ashiba den iba konang ya ajanga Mokokchung district nungi football meima asayar tajung

aika adoktsü tamang akarta Tetushi tejaoker State Election Commissioner Wb.T.John Longkumer IPS(Retd)-isa ashi.

MDFA Trophy tenzükba sentong tatsüka agidang Tsüngremer taochi jazüka MTBA Asso.Pastor Monglieri sarasadem, Organising committee,convenor R.Sünep Pongen-i tarur pela agizükba jembi iba den Kilemtula-i ken tajung ka tena sentong tobur jungdaksüba den Dr.Sentirenla Ozükum ketdangsuba nung iba sentong achaayanga agia liasü.

Taküm MDFA Trophy 2024 nung team ajak agi 12 lir,takok angurtemi sempet yamai agizüktsü Champion - Rs.200000/- Runners Up - Rs.100000/-,Semi Finalist - Rs.25000/- each-ta alitsü.

ISSF World Cup: Maskar-i 10m air rifle asaya nung silver angu



Mongputeni/October 15, 2024 (Agencies): India tsürtan rongnungi shooter Sonam Maskar-i tang New Delhi nung asaya aliba 2204 ISSF World Cup nung Mongolbarnü tetsür 10m Air rifle asaya nung silver medal ka nguogo.

Iba asaya ya China tsür Olympic champion Huang Yuting-i akok aser France tsür Oceanne Muller-i bronze medal ngua liasü.

Final nung India tsürtan rongnungi Tiltoma Sen trokbuba nung tembanga liasü.

Paris Olympics nung medal angula ya iba asayamung atema indang indanga qualify asü, ajisüaka Manu Bhaker, Sarabjot

Singh aser Swapnil Kusale nung shirnoki Olympics nung bronze medal ngua liasü, parnoki iba asayamung nung shilem magitsü teletmetba agia liasü.

Rhythm dak alia Ganemat Sekhon-a (women's skeet) world rankings dak ajemdaker iba asayamung nung shilem agitsü maongka nguogo aser junga asayattetsü imla atadar.

Arjun Babuta (men's 10m air rifle) aser Anish Bhanwala (men's 25m rapid fire pistol) na densema iba asayamung nung India team nung 2024 Paris Olympics nung asayar teku densema lir.

Rhythm, tetsür 10m air pistol aser 25m pistol asaya

anaprongla nung asayatsü.

Team nung tanga Olympian tem rongnung Mairaj Ahmad Khan (men's skeet), Divyansh Singh Panwar (men's 10m air rifle), aser Chain Singh (men's 50m rifle 3 positions) nung densema lir.

Maneni World Cup Final nung asayatsü atema Arjun Singh Cheema (men's 10m air pistol), Vijayveer Sidhu (men's 25m rapid fire pistol), Anantjeet Singh Narukha (men's skeet), Maheshwari Chauhan (women's skeet), Rajeshwari Kumari (women's trap) aser Shreyasi Singh (women's trap) nungera renema lir. Parnok ajak Paris Games nung shilem agiogo.

Iba asayamung ya Mongolbarnü tenzükogo aser tetsür 10m air rifle asaya ya mezüngbuba final liasü iba sülen tebur final asaya.

Iba asayamung nung linük 37 nungi shooter tajungtibatem densema asaya 131-i shilem agidar, kong Olympic nung medal ngur alirtema densema lir. Parnok asaya 12 nung tokteptsü.

AFCON Qualifier: Nigeria team-i Libya den masaya teletmetba agi

Mongputeni/October 15, 2024 (Agencies): Nigeria Football Federation (NFF)-i Hombarnü sangdong ka ajanga, 2025 Africa Cup of Nations qualifier masaya tsüngda Libya nung national team dang meimchir dang mebenschitsüba yimya benschiba atema parnok kidangi meyipaogo ta ashi.

"Nigeria nung delegate tem 15.05 ako shitak nung Al-Abraq Airport toktsür Kano yimti-i ao aser iba sülen Federal Capital, Abuja-i oa liasü," ta NFF-i ashi.

NFF director of Communications, Ademola Olajire-i, Libya nung team timtem indang metetdaksü aser ashiba agi, kanga dang yongya ata aliba asaya ya Libyan federal authorities aser Football Federation-i jenjang tapet magiba ajanga tamakok aludaktsüogo.

Nigeria football team ya Deobarnü Libya tonga aoba sülen ghonda 20 tashi mamshiba airport ka nung toktsü. Parnok ya Benghazi nung anentsü liasü, saka km230 pilar Al Abraq nung oa anentsü.

Nigeria-i Confederation of African football (CAF) nem tashishiba ka agütsüogo aser disciplinary board-i ken o bushisüngdangdar. Captain William Troost-Ekong-i ashiba

agi par team Al-Abraq nung Benina tashi bus nung mener maotsü ta shiogo, kechiyong security dak sendakba nung tebilemtsü akar.

"Team captain ka ama team den külemi onoki iba asaya nung shilem magitsü teletmetba agiogo," ta social media ajanga metetdaksü.

"Parnok nem point ji agüjang. Security agüjaka onok lenmang ajangabo idaki mesenzütsü kechiyong lendong lir. Onoki asayatsü atema teletmetba agia tejakdangi ora hotel aser chiyongtsütem koma süla ta bilemer," ta pai ashi.

CAF-i ashiba agi, Libya nung Nigeria National Football Team tajangshiba ya CAF-i kanga süteki ia agir.

CAF-isa, Libya aser Nigeria nung ketdangsurtem den tongtepratepogo, ta metetdaksü.

Kasa mapang nung Libyan football federation-i, parnoki inyakyim nung kecha aibelena mali aser parnoki Nigeria kanga akümtsübur ta shiogo.

Hokolbarnü Uyo yimti nung Nigeria-i goal 1-0 agi Libya koker lir.

Group D nung parnoki point tenet ngua parnok temaba jenjang nung lir aser Libya team-i point ka ngua parnok ponglang nung lir.

Cameron Green Border-Gavaskar Trophy nung masayatetsü

Mongputeni/October 15, 2024 (Agencies): Australia nung allrounder Cameron Green taruba anogo ishika tsüngda teberem surgery agitsü aliba ajanga Border-Gavaskar Trophy nung masayatetsüsa kümogo.

Green surgery agitsüsa akümba sülen pa ita trok tashi masayatetsü aser iba tetezü pa 2025 küm IPL nunga masayatetsüsa akümtsü.

Maneni pa February ita Sri Lanka nung oa Test asayatsü aliba aser Pakistan nung Champions Trophy asayatsü aliba nung shilem magitetsü.

September ita Australia team United Kingdom nung oa asayaba mapang Green teberem yiru aser scan asüba sülen teberem raksar aliba nguteta liasü. Pai surgery agitsü atema teletmetba agiogo, anungji pa ita aika masayatetsüsa akümtsü.

Cricket Australia-i ashiba agi, tarutsü nung iba timtem ya tanaben majangshitsü atema pa surgery agitsü.

Hopta ka tepeyong temang asadanga sülen Green-i surgery agitsü atema teletmetba agiogo aser iba ajanga India nung pacer Jasprit Bumrah ama pa indang career asüngsashitsütsü akok. Pai rehabilitation agitsü atema shimra pa Border-Gavaskar Trophy nung batter ka ama shilem agila.

Iba asayamung nung Green masayatetsüsa akümba sülen Australia nung batter Steve Smith No.4 nung asayatsü akok.

Cricket Australia-i Hombarnü India A den asayatsü atema A squad sangdongogo aser iba team nung yagi Green melentsü pur ka shimtsü imlar.

Kasa mapang nung Mitchell Marsh, Queensland den Western Australia indang Sheffield Shield asaya nung ball maon aser pa lenisüba nung Australia team white-ball asayamung nung asayaba mapanga ball kangabo moni liasü.

BILEMDANGANG

"Tamang agi timla agütsür."